

LA QUOTIDIANA

FMR Fundaziun Medias Rumantschas, Via da Masans 2, 7000 Cuira, 081 544 89 11, redacziun@fmr.ch



**In proxim project cun chanzuns popularas**  
*«Lain chantar» è suenter «La Grischa» u l'app «Falleri Fallera» in proxim project per chant da cumpagnia*[Pagina 2](#)



**In chapitel è scrit**  
*En sia columna repassa la redactura Sandra Balzer las davosas emnas e l'attenziun mediala per il vitg da Brinzauls.*[Pagina 8](#)

FMR

FUNDAZIUN  
MEDIAS  
RUMANTSCHAS

**südostschweiz**

SURSELVA

Campionadis mundials a Flem

La destinaziun Flem/Laax/Falera beneventa durant in'jamna las meglieras ed ils megliers sportists da cuorsa d'orientaziun digl entir mund. Ils campinadis mundials entscheivan ils 11 e cuozan entochen ils 16 da fenadur 2023. Ils organisateurs ein prompts per igl event che spetga biabein 300 atlets ed atlets da varga 40 naziuns, sco quei ch'els han orientau il margis vargau a Laax ad ina conferenza da medias. Gest suenter ils campinadis mundials suondan ils sportists da hobi dalla cuorsa d'orientaziun als fastitgs da campiunessas e campiuns. Flem/Laax/Falera spetga buca meins che 4500 hosps ch'ein sannunziai per il swiss-o-week dils 16 entochen ils 22 da fenadur 2022. (fmr/ac)

[Pagina 3](#)

ENGIADINA

Ün quart fin il dobel dapü fain quist an



Ils purs in Engiadina haun fin uossa pudieu racoglier traunter ün quart ed il dobel dapü fain cu la media.

FOTO MARTIN CAMICHEL

Quist an ho que do in ögl cha'ls purs haun cumanzo pü bod a fer cun fain in Engiadina. E quel fain ch'els haun fin uossa mno suot tet es tenor ils purs d'üna buna qualited. Per *Anton à Porta*, pur da Scuol, es ün bun fain, scha l'erva nun es auncha memma veglia, scha'ls stüjs sun pütöst gross e scha l'erva nun ho memma föglia. Da quista erva buna haun ils purs engiadinais pudieu racoglier fin uossa in tuot la val. E que in schurmas. Perche cha na be la qualited es ourdvart buna, dimpersè eir la quantited es quist an remarchabla. Uschè haun ils purs *Anton Giovanoli* da Segl ed *Arno Gabriel* da S-chanf pudieu racoglier var ün quart dapü fain cu la media dals ultims ans. A Ramosch ho il pur *Martin Bischoff* sün tscherts pros sulaglivs dafatta pudieu racoglier var il dobel dapü erva. La FMR ho fat üna pitschna retschercha davart la stagiun da fer cun fain 2023 ed ho dumando a quatter purs da Silvaplauna fin Ramosch davart lur experienzas cul prüm tagl quist an. (fmr/cam)

[Pagina 7](#)

GRISCHUN CENTRAL

100 persungas a Solas Soura

Solas Soura è durant igl onn en «caff» cun angal 10 abitants stabels. L'amprema dumengia da fanadour sa multiplitgescha igl domber per igl factour 10. Radund 100 persunas dallas vischnancas vaschinantas scu Lain, Muldain e Zorten en stos alla purdananza tradiziunala deditgeida a Nossadonna. Uscheia è la curt da Solas per en de prest davanto «la capitala da Vaz». Purdananza a Solas Soura monta dasperas la messa festiva er: giantar comunabel, galdeir la cumpagneia, sa lascher eir bagn ed esser cun taint. Celebrada è la messa neida da ser *Frank Schwegler*, igl plevant da Churwalden. (fmr/gns/sb)

[Pagina 8](#)

Critica pervia da tempo 30

Dapi dus meins ha il marcau da Glion sia zona da tempo 30. Per las automobilistas ed ils automobilists ch'eran disai da carrar cun 50 atras Glion hai giu num da s'endisar. S'endisar da traversar las vias senza sdremas han era las pedunzas ed ils pedunzs.

MARTIN GABRIEL/FMR

Midadas da sistem procuran savens per critica. Discussiuns animadas dat era l'introducziun dalla zona 30 en il marcau da Glion. Malgrad che biars ein satisfatgs che la canera da traffic ei tschessada fermamein, ei la critica enviers la reducziun dil tempo atras il marcau gronda. Ei vegn era criticau ch'ei detti neginas sdremas da pedunzas e pedunzs pli.

Via cantunala funcziunescha auter

Il menader da construcziun dalla vischnaunca Ilanz/Glion, *Andreas Pfister* di ch'ei detti

«La vischnaunca trai ina buna bilanza dall'introducziun dalla zona 30 el marcau.»

Andreas Pfister, menader da construcziun Ilanz/Glion

cunzun duas disposiziuns principalas per las zonas da 30. «Ina mesira ei ch'ei dat neginas sdremas da pedunzas e pendunzs pli e la secunda ei la regla dalla precendenza da dretg.» La vischnaunca Ilanz/Glion traigi ina buna bilanza dall'introducziun dalla zona da 30 el marcau, di Andreas Pfister. Quei che cuntenta buc il menader da construcziun communal da Ilanz/Glion ei ch'ei dat dus systems da precendenza e dus systems da traversar las vias. Andreas Pfister: «Dus differents systems fan vegnir malsegira la populaziun. Jeu hael tutta capientscha che quei dat in schischuri e che la gliעד sevila.»

[Pagina 3](#)

«Er schi la bova è a val, na saro chel tgapetel betg igl davos.»

La redactura Sandra Balzer dat in sguard sin il «chapitel» da la bova da Brinzauls. – Pagina 8



FOTO SARA TESTONI

Da l'autra vart dalla barriera

Duront treis unviarns ha la fotografa *Sara Testoni* d'Acquarossa fotografau il survetsch d'unviern al Pass Lucmagn. Ella ha giu la caschun da mirar davos las culissas, respectivamein da l'autra vart dalla barriera. L'exposiziun da fotografias ch'ella ha realisau en quei connex ei da vesar il mument el restaurant dil hospezi sil Lucmagn. Las fotos accompignadas da texts en romontsch, talian e tudestg dattan in'egliada singulara sin ina lavur cun bia senn da responsabladad. (fmr/hh)

[Pagina 5](#)

30027



9 771424 749004

Servetsch d'abunents e da distribuziun: tel. 0844 226 226  
mail: abo@somedia.ch